



EQIKKAANEQ

Ullut pingajuat 25. maj 2014

Sukat sisamaat "Ilinniartitaaneq aamma Suliffeqarneq" ataatsimeersuarnerup ulluisa pingajuanni sammineqarput. Saqqummiisut sisamaasut suliffeqarnikkut ilinniartitaanikkullu ullutsinni nunaqarfinni nunattalu sinnerani pissutsit sammivaat. Saqqummiinerni oqallinnernilu pingaartillugit maluginiakkat ilaat makkuupput:

- Inoqarfinni minnerni suliffissaaleqineq ilungersunartuuvoq, suliffissallu annikitsunnguugaluartulluunniit inoqarfinni minnerni inuiaqatigiinni angisuumik iluaqutaasarput.
- Taamaattumik aamma inoqarfinni minnerni suliassaqartitsiniarluni sanaartornikkut iluarsaassinikkullu aallartitassat arlariit nukingiuqqarput.
- Ilinniartitaaneq eqqarsaatigalugu maluginiassat nuannaajallannartut ilagaat nunaqarfinni atuartut angusamikkut illoqarfimmiunut naleqqiullutik angummalluarnerat, naak ilinniartisisoqarniarnikkut atortutigullu kinguarsimanerugaluartik.
- Nunaqarfinni ilinniartitaanikkut ineriartortitsiniarluni suliniut Sisimiuni aallartittoq iluatsittorlu isumalluarnarpoq, kissaatigineqarlunilu nunatta sinneranut siammarneqassasoq.

Ualikkut ataatsimeersuarneq naggaserlugu ataatsimeersuartut nunaqarfinneersut suleqatigiikkuutaanut agguataarlutik sulipput tassanilu sukat ulluni siuliini eqqartukkatik toqqammavigalugit nunaqarfinni piorsaanissamat kissaatitik pingaarnersiuiffigalugit.

Taakkunani erseqqissumik isumaqatigiissutaasut ilaatigut makkuupput:

- Nunaqarfinni innuttaasut oqaasiinnaangitsumik timalimillii najukkaminni pissutsinut iluarsaaqataallutik inerisaaqataasinnaalernissaat.
- Nunaqarfinni talittarfiit, aqquserngit illullu iluarsaallugillu nutaanik sanaartornissaq, sapinngisamik tassani najugaqartut sulisoralugit.
- Aalisakkeriviit tunitsiviinnaajunnaarsillugit tunisassiorfinngorartinnissaat, taamaaliornikkut suliffiit amerlanerit pilersillugit, aningaasallu nunatsinni kaaviiartitat amerlillugit.
- Nunaqarfinni ilinniartitaanikkut siuarsaanissaq, ilaatigut suliniutit nutaat isumalluarnartullu piorsaqqinnerisigut siammarternerisigullu.
- Inunnik isumaginnikkut peqqinnissakkullu pissutsit pitsaanerulersinniarlugit isumaginninnermik peqqinnissamillu sullissisut pikkorissartuarnissaat, ataqatigiinnerusumillu suleqatigiinnerulernissaat, ilaatigut pitsaaliuinnermik suliniutitigut.

Naggataatigut ataatsimiititaliap 10-nik inuttallip ataatsimeersuarnerup inassuteqaataanik malinnaasussap pilersinneqarnissaa akuerineqarpoq.